

RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

26-28 Avrêl 2024

Riha

BAN • DÎTAM • DÎSA • BOTAN INTERNATIONAL • KURDISH STUDIES CENTER • WEQFA MEZOPOTAMYAYÊ
WEQFA TAHİR ELÇİ • WEŞANXANEYÊ VATEYÎ • DKVD • KÜRT-KAV • BARAN TURSUN VAKFI • LÊKOLÎNÊN KURDÎ
CHALAK EVENTS WAN • DÎWAN INTERNATIONAL THEATRE ACADEMY - ŞERMOLA PERFORMANS
XÎRET FOUNDATION • KOMELEYA ÇAND Û ZIMANÊ KURDÎ • BATMAN YENÎ SAHNE
DEMOS ARAŞTIRMA DERNEĞİ • ENSTÎTUYA KURDÎ YA PARÎSÊ

Rapora Komxebata Diyalogê Ya Di Navbera Saziyên Sivîl û Aktoran Da

26-28 Avrêl 2024

Riha

Naverok

Pêşgotin / Ayşe Tepe Doğan / 01

Ji Nû ve Hızırîna li Civaka Sivîl: Model û Peywir / 03

Panoramaya Civaka Sivîl: Tesbît, Kêşe, Çareserî / 04

Pêkhatiyên Civaka Sivîl: Kêşeyên Binyadî û yên Fonksiyonel / 08

Kêşeya Sazûmanbûnê / 09

a) Kêşeya Çavkaniyên Mirovî / 09

b) Kêşeya Berbiçavbûnê / 09

c) Kêşeya Angajmanên Siyasî û Çeperên Tematîk / 09

d) Arîşeya Piralîparêzî û Giştîgiriye / 10

e) Kêşeya Domdariyê / 11

Kêşeya Ekonomîk û Xwegihandina Fonên Navneteweyî / 11

Pêşniyazên Komxebatê / 12

Pêşniyazên giştî / 12

Pêşniyazên pratîkî yên derbarê diyaloga Pêkhatiyên Civaka Sivîl de / 13



**RAPORA KOMXEBATA DIYALOGÊ YA DI NAVBERA
SAZIYÊN SIVÎL Û AKTORAN DA**

*“dê hebûya me îttîfaqek
Vêkra bikira me înqiyadek...”*

Pêşgotin

Seqaya parçeyî û berbelav a ku qada polîtîk a Kurdî dorpêç dike, di qada civaka sivil da jî diyar dibe. Ev rewş, bandoreke neyînî li diyalog, şîrîkatî û hevkarîya Pêkhatiyên Civaka Sivîl* (PCS) dike. Lawaziya çanda diyalog û hevkarîyê, kêma-hiya asta sazûmanîyê, kêşeya çavkaniyan, angajmanên siyasî; faktorên sereke ne ku hevkarîya di navbera PCSyan da sînordar dîkin. Kêmahiya diyalogên afirî-ner û mizakereyên rexneyî potansiyela PCSyan a veguherandina civakî berbend dike, her weha derfetên geşepêdana qada sivil jî sînordar dike. Mişkileyên ber-behs di qada xebat û pratîkê da jî bi gelek awayan xwe didin der. Wek nimûne; PSCyên ku xebatê Kurdî dîkin, di xwegihandina çavkaniyan da zehmetiyan di-kişînin û ew derfet bisînordar dibe ku bi hev ra çavkaniyan biafirînin. Ev mişkile hêz û bandora xebatan lawaz dîkin û berbiçavbûna fealiyetên PCSyan sînordar dîkin û pê ra rêyê li ber parvekirina tecribeyên sazûmanbûne jî digirin. Ji ber kêmahiya diyalog û jihevagadarbûnê gelek caran xebat hevdu dubare dîkin ev jî dihêle ku derfetên bisînor ziyan bin. Ev rewşa bikêşe rêyê li ber hevahengî û



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

sinerjîya di nav xebatan da digire, lewma jî fonksiyona xebatan a civakîbûnê û bihêzkirina qada sivîl berbandê dibe.

Faktorên berbehs ên di biwarê diyalog û hevkarîyê da bandorên neyînî dihêlin, di heman demê da dibin çavkaniya motîvasiyona lêgerînê diyalog û mizakereyên PCSyan.

“Komxebata Diyalogê ya Di Navbera Saziyên Sivîl û Aktoran da” ya ku bi pêşengiya Weqfa BANê ya Zanist Çand û Hunerê tê li dar xistin, piştewaniya diyalog û hevkarîya di navbera wan PCSyan dike ku xebatên Kurdî ji xwe ra dîkin armanc. Komxebat di heman demê da ji bo avakirina toreke civaka sîvîl a kolektîf, çalak û berhemdar hewldaneke lêgerînê ye jî. Tevkarîya avakirina qadeka qamûyî ya pluralîst û sazkirina delîveya civakeke sivîl û demokratîk armanca sereke ya komxebata navborî ye. Di bangnameya komxebatê da armancên şênbêr ên komxebatê bi van çar xalan tên ragihandin:

1. Xurtkirina peywendiyên di navbera PCSyan da; zêdekirina îmkânên diyalogê û rêxweşkirina zemîna pêkvexebatê.
2. Mizakerekirina pirsigirêkên navxweyî û derveyî yên PCSyan.
3. Ji bo lêgerina derfetên xebatên hevpar a ku dê bi armanca piştewaniya fealiyetên mafparêziyê rabe.
4. Mizkarekirina rêbaz û mekanîzmayên mayîndekirina hevkarîya di navbera wan PCSyan da ku xebatên Kurdî dîkin.

Komxebata navborî, di 26-28ê Avrêla 2024an da li Rihayê pêk hat. Ji 19 PCSyên ku li Kurdistan, Tîrkiye û Ewrûpayê di qada ziman, zanist, huner, çand, weşangerî, mafparêzî, piştewaniya civakî û raporkirinê da dixebitin, 26 kes tev li komxebatê bûn. Komxebat bi pêşkeşîya saziyan û bi niqaş û mizakereyên serbest, 2 rojan dom kir. Di beşa ewil da her beşdarî kurteraborîya saziya xwe, şiklê sazûmanîya xwe, armanc û mebestên xwe berpêş kirin û derbarê wan xebatên xwe da ku heta îro kirine, yên halê hazir û derbarê projeyên xwe yên pêşedemê da beşdarên din agahdar kirin.

* Di raporê da ji dêvla “Aktor û Rêxistinên Civaka Sivîl”, dê îfadeya “Pêkhatiyên Civaka Sivîl” bê bikaranîn ku raya li ser ew e ku li gel kurtbûna xwe, ew her weha bêhtir lixwegir e.



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

Di rûniştina ewil ya beşa 2yem da, rewşa giştî ya qada civaka sivîl a Kurd hat mizakerekirin û kêşeyên sereke yên qadê hatin nîqaşkirin. Di rûniştina 2yem da, kêşe û pirsgerêkên PCSyan hatin tesbîtkirin. Di rûniştina 3yem a dawîn da jî ji bo çareserkerina pirsgerêkên hatine tesbîtkirin pêşniyarên giştî û yên pratîkî hatin derpêşkirin. Di heman rûniştinê da bi armanca mayîndekirina diyalog û hevkarîya PCSyan, gotûbêj li ser derfet û mekanîzmayên mihtemel hatin kirin.

Rapora berdest, nîqaş û pêşniyarên komxebata navborî û danasîna saziyên beşdar li xwe digire. Metoda raporê, tomarkirina hemû nîqaş û pêşniyaran e. Her çi qas beşdar li ser piraniya raman û tesbîtên di raporê da hemfikir bin jî her boçûn raya hemû beşdaran rave nake; hin xisûs bi tenê qenaeta hinek beşdaran raber dikin. Rapor dide ber xwe ku nîqaş û pêşniyarên komxebatê pêşkeşî raya giştî ya Kurd bike û bala saziyên têkildar bikêşe ser nîqaşên PCSyên ku xebatên Kurdî dikin. Ji bilî vê, bi nivîsina vê raporê, tevkarîya lêgerîn û xebatên xurtkirina çanda diyalog û hevkarîyê tê armanckirin. Her weha bi vê rapora li ber destên we, armancek jî ew e ku li arşîva civaka sivîl ya Kurdî dokumentek zêde bike.

Ji Nû ve Hizirîna li Civaka Sivîl: Model û Peywir

Mirov dikare bibêje ku di serdema îroyin da konsensuseke ramanî heye ku civaka sivîl, weke qadeke der-dewletî tê pênasekirin û PCSyên serbixwe yên ku li derveyî qada dewletê xwe birêxistin dikin, fealiyetên xwe li gor “feydeya civakî” bi rê va dibin. Lewma jî rewşa dîrokî, çandî, hiqûqî, komeleyî ya civaka ku xebat li nav tîna meşandin, binyat û pênaseya PCSyan diyar dike. Her weha pirsgerêkên resen ên civakan, di warê fonksiyon û peywira PCSyan da diyarker in. Ji ber ku civaka Kurd ne xwedî statuya hiqûqî û siyasî ye, teşeya PCSyên ku li ser pirsgerêkên civaka Kurd dixebitin, karakterekî nû tîne pê ku li derveyî formên klasîk yên Civaka Sivîl e. PCSyên serbixwe yên ku bi awayekî xwederî hewl didin sivilbûnê û civaka sivîl bihêztir bikin, neçar dimînin ku bi wan karûbaran rabin û bi rê va bibin ku dewlet wan organîze û fînanse dike. Di warê ziman, perwerdehiya bingehîn, dîplomasî, parastina nîrxên çandî û xwezayî û hwd. din da wekî saziyên dewletî û siyasî xebat tîna meşandin. PCSyên ku berbendkirina deshilata qamûyî ji xwe ra dikin armanc, di heman demê da hewl didin ku bi derfetên kêr, wan xebatan bi rê va bibin ku hêza qamûyî jê ra divê. Ev yek, di qada pratîk da jî dibe sedema kêşeyên giran.

Li gel vê, deshilata ku ji aliyê PCSyan va tê problematîzekirin, ji bo civaka Kurd ne deshilateke navxweyî ye belku derveyî ye. Ev rewşa “derasayî”, çawanî û lixwegirîya polîtîkayên zext, mêtin, qedexe, bînpêkirinên dewletê jî karakterîze dike.



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

Ev rastî, xwe wek xespkirina mafên kolektîf/neteweyî, pişaftin, midaxeleyên demografîk, bînpêkirinên giran ên mafên mirovî û hwd. dide der. Ev rewşa heyî, fonksiyon û peywira PCSyan a wekî diristkirina projeyên çareseriyê û parastina maf û azadiyên bingeîn jî karakterîze dike. Hevterîbî vê yekê, kar û xebatên PCSyan ên Kurdî bi hêsanî tîrî terorîzekirin û krîmînalîzekirin. PCSyên navborî jî vê hêlê va jî ji PCSyên klasîk cuda dibin. Bo nimûne; beşdarek diyar dike ku Kurdîbûna xebatekê ji bo krîmînalîzekirinê bes e; naveroka xebatê ne mihim e.

A soxîn: Çawa ku hat diyarkirin, modela Civaka Sivîl a Tirkiyeyê ya salên 1970yî ji bo PCSyên ku xebatên Kurdî dikin ne guncaw e, ji hêla din va modela Rêxistinên Civaka Sivîl (RCS) a ku di salên 1990î de li Kurdistanê wek "parêzvaniya mafên mirovî" dest pê kiriye û paşê bi giranî veguheriye "baskên" tevgera serdest a siyasî jî, roja îroyîn ne fonksiyonel e û nema dikare bê domandin.

Nîqaşa "model û penaseyeke nû ya civaka sivîl" a li gorî reseniya şert û mercan, dikare ji bo veguherîna civakî û geşedana sazûmanî rêxweşker û têrker be. Nîqaş û lêgerînên bi vî awayî dê rol û peywira PCSyan jî zelaltir bike. Wek ku beşdarek jî dipirse; "Gelo bi pênasê û modela heyî kar diçe serî?" Ev pirs, babeteke sereke ya mizakere û diyaloga civaka sivîl ya Kurdî ye û potansiyeleke veguherîner û rêxweşker li xwe digire.

Panoramaya Civaka Sivîl: Tesbît, Kêşe, Çareserî

PCSyên ku di qada ziman, zanist, huner, çand, weşangerî, mafparêzî, piştevaniya civakî û raporkirinê da dixebitin, her yek di qadên pîsporiya xwe da fealiyetên tematîk bimeşînin jî ew di qada parastin û kemilandina nasnameya Kurdî da digihîjin hevdu. Qada polîtîk a ku PCSyan digihîne hev, di nava xwe da gelek rediyê û angaştên avaniyê dihevin ku ew di heman demê da zemîna heyber a pêdivî û lêgerînên diyalog û hevkariyê ava dike. Asta kapasîteya PCSyan a tehlîl-kirina rewşa giştî ya qadê û tesbît-kirina pîrsgirêkên esasî yên ji bo bipêşxistina projeyên çareseriyê xwedî girîngiyeke krîtîk e.

PCSyên ku hewl didin çanda demokrasiye bikemilînin û di avakirina qada qamûyî ya pluralîst da karîger bin, bi diyalogeke afirîner dikarin pratîkên tehlîl-kirinê kolektîvîze bikin û bi vî awayî asta kapasîteya xwe ya çareseriyê bihêztir bikin. Ev pêvajoya hevbeş, wê rêyê li ber şênberkirina mijar û qadên tevkariyê jî veke.

Piştî ku beşa ewil bi hev naskirina saziyan bi dawî bû, beşa 2yem a komxebatê



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

dest pê kir. (Hûn dikarin di beşa dawîn a raporê da çav li danasîna saziyên beşdar bigerînin.)

Di beşa 2yem da rewşa giştî ya qada civaka sivîl hat tehlîlkirin û kêşeyên binyadî û fonksiyonî yên PCSyan hatin tesbîtkirin. Her weha, çareseriyên pirsgirekên tesbîtkirî hatin mizakerekirin.

Kêşeya herî sereke ya ku beşdar li ser hemfikir bûn, polîtîkayên zext û pişaftinê yên li ser çand û zimanê Kurdî ne. Wek encama herî xuya ya polîtîkayên sîstematîk ên li ser çand û zimanê Kurdî; kêmbûna rêjeya bikaranîna zimên a di jiyana rojane da ye ku gihîştîye asteke xeternak. Lêkolîn û raporên demên dawî, vê rewşa endîşedar piştrast dikin. Her çî qas di xebatên ji bo werara zimên û hewldanên bikaranîna Kurdî ya di qada gelemperî da zedebûnek hebe jî, ev xebat û hewldan (ji ber ku zimanê Kurdî ne xwedî statuya fermî û yasayî ye) nikarin rêyê li ber pişaftinê bigirin. Nexasim, rêjeya bikaranîna zaraveyê Kirdkî (Kirmanckî/Dimilkî/Zazakî), vê rewşa xeternak radixe ber çavan ku ber bi pişaftinê va diçe. Wek kêmbûna cidî ya bikaranîna rojane û navmalî, asta bikaranîna Kirdkî (Kirmanckî/Dimilkî/Zazakî) ya di qada siyasî û rewşenbîrî da jî pir lawaz e. Ev yek ji bo qada civaka sivîl jî derbasdar e. Bo nimûne, beşdarek diyar dike ku Kirdkî di qada siyasî û rewşenbîrîyê da hema bêje nayê temsîlkirin û her ku diçe dibe mijara mijûlahiyên şexsî û pisporî. Li gel pisporiyên xwe yên spesîfîk û xebatên xwe yên xweser, hemû PCS ji bo parastin û kemilandina çand û zimanê Kurdî xwedî hesasiyet û nêrîneke hevpar in. Lê ev hesasiyet hê negihîştîye stratejî û plansaziyeke hevbeş. Her weha, helwêsta siyasîyê Kurd a li hemberî polîtîkayên sansur û asîmîlasyonê, ji asta prototestoyî û çalakvaniya siyasî wêdatir naçe. Diristkirina stratejî û plansaziyeke hevpar a PCSyên serbixwe û rexneyî ya biarmanca misogerkirina çand û zimanê Kurdî, dikare zexteke pozîtîf li saziya siyasîyê bike. Di vê çarçoveyê da hewldaneke berfireh a ku dê tevlibûna hemû aliyên civakî û polîtîk teşwîq bike, dikare pirsgirêkê di qada neteweyî û navneteweyî da zêdetir bixe rojevê. Pêngavên bi vî awayî dê asta civakîbûna kêşeyê bilindtir bikin û zexteke sivîl û demokratîk li desthilatiya navxweyî û derveyî bikin. Ji aliyê din va, (li gel zimanên cihanî) bikaranîna Kurdî wek zimanê serekî ya di kar û xebatên PCSyan da, ji bo gelemperîkirin û "normalîzekirina" Kurdî dê gelekî bikêrhatî be.

Çanda serdest a ku xwe dispêrê deshilata serwer, bi gelek amrazên îdeolojîk û mekanîzmayên zorê hewl dide çanda Kurdî di nava xwe da bihelîne. Polîtîkayên asîmîlasyona çandî, di heman demê da teşegirtina hizrî û tevgerî ya takekesî



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

ûkolektîf tehrîb û manîpule dikin. Ev fonksiyona hilweşîner a asîmîlasyona çandî sîvîlîzasyona civakî jî lawaz dike. Lewma jî civakîkirina xebatên ramanî, çandî û hunerî yên ji bo parastin û werara “xwebûnîya kolektîf” xwedî roleke stratejîk in. Her weha, ji bo zindîkirina bîra civakî û dîrokî; berbelavkirina xebatên parastina nîrxên çandî û xwezayî -yên şênber û razber- babeteke jêner e. Nebûna saziyên neteweyî/qamûyî yên bi armanca parastina nîrxên çandî, bar û rola PCS-yên serbixwe girantir dike.

Her çî qas derbarê belgekirin û parastina nîrxên çandî û xwezayî, û veguhestina wan a ji bo nîfşên siberojê da hin xebat hebin jî gelekî lokal û bisînor in. Nexa-sim xebatên berhevkirin, arşîvkirin û parastina berhemên folklorîk hêma bêje bi hewlên şexsî dimeşin. Xebatên berbehs ên ku hêza qamûyî divên, bi derfetên gelek bisînor tên meşandin, ev yek jî fealiyetên di vî warî da bêkarîger dihêlin. Li gel vê, berhemên çandî yên ku bi kedeke mezin tên berhevkirin û arşîvkirin ji mekanîzmayên parastinê bêpar in. Ji bo nîrxên çandî û xwezayî -yên şênber û razber- bîna parastin, bibin malê civakê û di nav mîrateyên cihanê da cihê xwe bigirin, divê xebatên di vî warî de bîna sazûmankirin. Lê mirov nikare bêje PCS-yên ku xebatên Kurdî dikin, di vî warê da xwedî stratejiyên demdirêj û kartêker in.

Polîtîkayên pişafînê bi tenê bandorê li ser kemiyet û rêjeya bikaranîna zimên nakin. Her weha bandorê li çawanî û nîrxê xebatên li qadên çand, huner, çapemenî, medya û hwd. jî dikin. Nebûna perwerdehiya bi zimanê zikmakî, tunebûna akademî û konservatûvaran; her weha kêmbûna çavkaniyên Kurdî, (Çavkanî bi giranî Tirkî an jî werger in) bandorê li teşegirtina bîreweriya xwebûnî ya aktorên û şeweya raman û pêhesîna wan jî dike. Ev yek taybetmendîya ramanî û estetîk a xebat û berheman jî bi giranî diyar dike. Her weha pişafîna zimanê zikmakî, eleqeya bînerên Kurd a ji bo hunerên sehneyî jî kêmtir dike. Bo nimûne, beşdarek bal dikêşe ser vê rastiyê û diyar dike ku heke perwerdehiya bi zimanê zikmakî pêk neyê, cihê gumanê ye ka “çend nîfşên din wê bînerên kurdîxêv hebin an na!” Rewş, ji bo saziyên di qada weşangerî, çapemenî û medyayê da dixebitin jî bi heman awayî ye. Lewra saziyên navborî neçar dimînin ku hem berhemê hem jî daxwaz û talebê biafirînin. Li gel vê, aktorên navborî ji aliyekî va duçarî zext, sansur û qedexeyên desthilata navendî dimînin, ji aliyê din va jî ji ber helwêsta siyaseta serdest a Kurd, bi zehmetiyan ra rûbirû dimînin.

Wek mînak; saziyên rêveberiyên heremî yên di bin hikmê siyaseta serdest a Kurd da, bi tenê piştgiriya dezgeh û komên di bin siwana xwe da dikin, lê xwe



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

ji kom û saziyên serbixwe bi dûr dixin, heta gelek caran wan asteng dikin. Ev helwêsta astengker a îdeolojîk ji bo hemû PCSyên serbixwe û rexneyî jî derbasdar e. Ev rewş, zemîna diyalogê ya di navbera PCSyên serbixwe û saziyên angajebûyî da jî têk dibe.

PCSyên ku di qada çapemenî û medya da dixebitin jî duçarî heman kêşeyan dibin. Wek aktoreke qada qamûyî, medya; bi erka xwe ya hilberîn û belavkirina agahî û zanyariyê, rasterast bandorê li pêvajoyên avakirina raya giştî dike. Ji ber vê erka xwe ya stratejîk, medyaya klasîk û ya “nû” ji mêj va ye ku bûne hedefa mîdaxeleyên desthilatdaran. Medyaya serbixwe û rexneker a Kurdî jî duçarî zext, sansur û krîmînalîzekirina desthilata navendî dibe. Naverok her çî be jî bi tenê Kurdîbûna zimanê medyayê dikare bibe hinceta krîmînalîzekirinê. Ji aliyê din va, siyaseta serdest a Kurdî jî têkiliya xwe ya bi medyaya serbixwe ra li gorî milahezeyên xwe yên îdeolojîk datîne. Bendewariya siyaseta berbehs ji medyayê, bi tenê propagandakirina wan a siyasî û îdeolojîk e.

Ev rewşa dualî, têgihîştin û feraseta raya giştî ya Kurdî ya derheqê medyayê da jî diyar dike. Wek hilgira zimên medyaya Kurdî, ji bo bikaranîna Kurdî ya di qada gelemper da bi roleke teşwîqker radibe. Medyaya serbixwe ya Kurdî jî wekî hemû PCSyên serbixwe neçar dimîne ku serî bi kêşeyên çavkanîyên aborî û mirovî ra derxe. Polîtîkayên gotî yên krîmînalîzekirinê, rêyê li ber xwegihandina fonên navneteweyî jî digirin. Beşdarek diyar dike ku tevî ku bi hezaran dezgehên medyayî yên Tirkî hene jî, dezgehên Tirkî li gorî hindek dezgehên medyaya Kurdî, zêdetir û hêsantir xwe digihînin fonên navneteweyî. Polîtîkayên krîmînalîzasyonê derbarê hemû PCSyên serbixwe da têgihaneke neyînî û berbendker dirist dike. Ji bo têkbirina vê têgihana çêkirî ya ku ji polîtîkayên krîmînalîzekirinê tê pê, hewldanên stratejîk û plansaziyên hevpar hewce ne.

Mijareke din a ku beşdarên komxebatê balê dikêşin ser; li gel zêdebûna bînpêkirina mafan, kêmbûna fealiyetên mafparêzîyê û hevterîbî wê, lawazbûna asta reaksiyonên demokratîk a raya giştî ye. Di serî da li dijî mafê jiyînê, li dijî serbestiya raman û derbirînê polîtîkayên xesp, îhlal û çewsînêriyê her ku diçe zêdetir dibin. Tevî vê rastiyê, qelsbûna pratîkên parêzvaniyê ya civaka sîvîl, mijareke sereke ya diyalog û mizakereya civaka sîvîl e. “Rewş û hawîrdora neewle” ya ku dibe sedem ku civak xwe bêparastin his bike rêyê li ber civakîbûna xebatên PCSyan jî digire. Her weha rewş û seqaya berbehs potansiyela çavkaniya mirovî ya civak sîvîl jî teng dike:



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

Fikara krîmînalîzebûnê, pêşî li tevlibûnen civaka sivîl digire; nexasim ciwan bi endîşeya ewlehiyê, xwe ji saziyên civaka sivîl bi dûr dixin. Tesbîtkirina kêmasiyên qada parêzvaniyê ya bi armanca afirandina çareseriyên sivîl û demokratîk a li dijî bînpêkirina mafan, her weha bihêzkirina tevkarîya PCSyan a bi vê mebestê, dê asta hesasiyeta raya giştî zêdetir bike. Nûanseke girîng a ku divê li ber çavan bê girtin, veguherînên nû yên civakî ne, ev geşedan tesîrê li mijara berbehs jî dikin. Xuya ye ku di serdema nû da “hesasiyeta raya giştî” li ser medyaya civakî mobîlîze dibe.

Lewma jî ji bo pêşxistina stratejiyên nû yên parêzvaniyê; famkirina dînamîkên guherînên civakî û tehlîlkirina pratîkên nûjen yên mafparêziyê, her weha ponjîna li ser formên reaksiyonên “nifşên nû” dibe ku sûdmend be.

Ji aliyê din va, ji bo famkirina tengbûna qada civaka sivîl/raya giştî; mizakerekirina taybetmendiya Qada Qamûyî -ya ku raya giştî lê ava dibe û geş dibe- dê bikêrhatî be. Jixwe komxebata navborî “piştevanîya avabûna qadeka qamûyî ya pluralîst” wek hedefeke sereke deklare dike. Hin beşdar di wê baweriyê da ne ku qada qamûyî ya Kurdî di qonaxa geşedane da ye, lê hin beşdar jî angaşt dikin ku mirov hêj nikare behsa hebûna qada qamûyî ya Kurdî bike. Nîqaşên di vê peywendê da ji bo PCSyên serbixwe yên ku xebatên Kurdî dikin, ne bi tenê nîqaşên xwerû-teorîk in, di heman demê da ji bo diristkirina stratejiyên civakî yên demdirêj jî peywireke bingeîn in.

Ji bilî vê, asta pêkhatin û geşedana qada qamûyî, pênasîya model û peywira PCSyan û taybetmendiya fealiyetên wan diyar dike; ji aliyê din va jî asta sazûmanbûn û civakîbûna PCSyan jî bandorê li pêvajoya pêkhatin û veguherîna qada qamûyî dike. Wisa xuya ye ku nîqaşên derbarê avabûna qada qamûyî ya Kurdî da, dê babeteke sereke ya diyaloga civaka sivîl bin.

Pêkhatiyên Civaka Sivîl: Kêşeyên Binyadî û yên Fonksiyonel

Di beşa 2yem a rûniştina 2yem da, beşdaran derheqê problemên navxweyî û derveyî yên qada civaka sivîl da nîqaşên serbest bi rê va birin. Kêşeyên ku di dema meşandina xebatan da PCS rastî wan tên, hatin tehlîlkirin û çarerêyên ji bo biserîderxistina wan pîrsgirêkên berbehs hatin guftûgokirin. Ji nîqaşên beşdaran berbiçav dibe ku di bingeha gelek kêşeyan da kêmanîya asta sazûmanîyê heye, her weha kêmbûna kapasîteya sazûmanbûna PCSyan jî rêyê li ber gelek kêşeyên din jî vedike. Ji ber vê yekê, di bin sernavê “Kêşeya Sazûmanbûnê” da ravekirina kêşeyên binyadî û fonsiyonî wê rêbazeke mifadar be.



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

Kêşeya Sazûmanbûnê

a) Kêşeya Çavkaniyên Mirovî: PCSyên ku sazîbûna wan ji rêvabir, profesyonel û dildaran pêk tê, bi qasî ku hewce ye, nikarin xwe bigihînin kesên profesyonel ên ku di qadên xwe de pisporek û her weha dildaran jî. Ev yek asta kapasîteya sazûmaniyê kêmtir dike û bandoreke neyînî li ser taybetmendiya kar û xebatan dike. PCSyên serbixwe bi polîtîkayêke bikêrhatî û ewledar a “bi rêvabirina dildaran” û bi feraseta rêvabiriyêke şefaf, etîk û dadmend dikarin kapasîteya xwe ya sazûmanbûnê bihêztir bikin. Her weha, feraseta rêvabirinê ya ku endam û dildaran dike hevparên pêvajoyên biryargirtinê, wê têkilî û dilsoziya peydabûyî mayînde bike.

Li gel vê, taybetmendiya xebatan û asta serkeftin û parvakirina projeyan, ji bo tevlibûna dildarên zêdetir, dikare rêxweşker be. Ji aliyê din va, kêşeya çavkaniyên ekonomîk û ya çavkanîyên mirovî têra xwe bi hev ra peywendîdar in: Desttengiya PCSyên serbixwe, derfeta wan a xwegihandina kesên profesyonel û şareza asteng dike.

b) Kêşeya Berbiçavbûnê: Asta berbiçavbûna PCSyên ku xebatên Kurdî dikin, têra xwe bisînore. Medyaya klasîk û ya “nû” têra xwe nayên bikaranîn, ji aliyê din va xebatkarên di warê xwendewariya dijîtal da şareza, kêmtir in. Ev kêmasî asta berbiçavbûna PCSyan a neteweyî û navneteweyî lawaz dike. Nexasim bikaranîna kartêker a medyaya civakî, dê ji bo xwegihandina nîfşên nû û hemû beşên din ên civakê hêsanîyekê pêk bîne. Îstifadekirina ji amrazên înfomatîf ên “nûjen”, ji bo xwenasandina saziyên sivîl û ji bo fealiyetên wan zêdetir bêtir dîtin, dikarin xweyî bandor bin. Pêşkêşkirina berhem û projeyan a bi rêya platformên dijîtal û blogên dengî dê bêtir bala raya giştî bikêşe û her weha dê networka PCSyan dewlemendtir bike. Bo nimûne, hunermendekî beşdar, ji mînakên hevşêwe yê Ewrûpî behs dike û diyar dike ku PCSyên Kurdî jî dikarin fealiyetên xwe yê rûtîn bi performansên hunerî re sentez bikin. Formên “armonîk” yê bi vî awayî û rêbazên afirîner, dikarin berhemdariya xebatan zêdetir bikin û bêtir bala raya giştî bikêşin. Her weha meşandina xebatên lobiyê yê bi rêya platformên mişterek, dê berbiçavbûna PCSyan a di qada nawneteweyî de zêdetir bike.

c) Kêşeya Angajmanên Siyasî û Çeperên Tematîk: PCSyên serbixwe yê ku her yek ji wan di qadên xwe da xebatên girîng dikin, pirî caran xwe bi xebatên xwe yê spesîfîk bisînore dikin. PCSyên ku xebatên Kurdî dikin, xwedî rediyeyên polîtîk in, ev yek taybetmendiya wan a hevpar e. Ev taybetmendiya pêkhêner, zemîna hevkarî û diyaloga di navbera wan da jî şênber dike. Lê pratîkên ku xwe



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

di nav çeperên tematîk de sînardar dikin û zemîna pêkhênêr a qada sîvîl piştguh dikin, nikarin piştevaniya geşedana qada qamûyî bikin. Ev rewşa ku rêyê li ber hevparîkirina tecribeyên sazûmanbûnê digire, asta giştî ya sazûmanîya civaka sîvîl jî qetûbir dike.

Ji aliyê din va gelek Rêxistên Civaka Sîvîl (RCS) yên Kurdî jî xwe di nav çeperên siyasî da bi cih dikin. Mîna cemawera Civayaka Sîvîl a Tîrkiyeyê, çendîn RCSyên Kurdistanê jî hebûna xwe di bin sîwana tevgerên siyasî da didomînin. Wek tê zanîn, tevgerên siyasî yên Kurdî jî mêj va di qadên çapemenî, huner, çand û hwd. da RCSyên xwe saz kirine. Ev yek di navbera PCSyên serbixwe û desthilata siyasî da rageşiyekê diqewimîne û rêyê li ber derfetên veguherînên civakî digire. Her weha, ev dubendiya bipirsgirêk potansiyela veguherîner a civaka sîvîl jî ber-bend dike.

Angajmanên siyasî di heman demê da derfetên diyalog û hevkarîyê yên qada civaka sîvîl jî berhewa dikin. Lê PCSyên serbixwe û rexneker bi perspektîfa “fey-deya civakî” dikarin asta xwe ya sazûmanbûn û hevkarîyê berfireh bikin û bi vî awayî tesîreke erênî û veguherîner li “saziya siyasetê” bikin. Hin beşdar di wê baweriyê da ne ku legerîna diyalog û tevkarîyê ya bi saziyên angajebûyî ra dê piştevaniya geşedana civaka sîvîl bike. Her weha beşdarên navborî diyar dikin ku ev lêgerîn divê li dor prensîb û protokolên şênber bîn meşandin û PCSyên serbixwe li helwêsta xwe ya rexneker miqate bin.

d) Arîşeya Piralîparêzî û Giştîgiriye: Qelsiya giştî ya diyaloga rexneyî û afirîner a di navbera aliyên siyasî û civakî da xwe di binesazî û fealiyetên PCSyan da jî dide der. Danûstandinên “monolîtîk” ên ku cihêrengiya ramanî îhmal dikin, pratîkên civakîbûneke prualîst jî asteng dikin, ev yek di heman demê da rêyê li ber geşedan û veguherînên demokratîk ên civaka sîvîl digire. Ji aliyê din va normên civakî yên ku xwe dispêrin cihêkariya temenî û zayenda civakî, di nav PCSyan da jî tîna temsîlîkirin û xwe ji nû va saz dikin. Ev yek pêşî li beşdarbûna jin û civanan a ji bo qada civaka sîvîl digire û kapasîteya sazûmanbûna PCSyan kêmtir dike. Her weha ferasetên otorîter û xweperest hem di qada civaka sîvîl hem jî di birêvabirana saziyan da blokajan ava dikin. Saziyan ku di qada civaka sîvîl da blokajên hegemonîk ava dikin û aktorên ku di nav saziyan da blokajên deshi-latdariyê saz dikin û pê ra bi pratîkên xwe feraseta giştîgiriya û piralîparêz a civaka sîvîl sabote dikin. Feraset û nêzikatiyên berbehs ên ku vîzyon û xuyanga civaka sîvîl xirab dikin, di heman demê da kêşeya sazûmanbûn û domdariyê jî tînin pê.



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

e) Kêşeya Domdariyê: Kêşeyên ku li jor hatin derpêşkirin (ku puxteya tesbîtên beşdaran rave dikin) bi giştî teqabilî kêşeya domdariyê dikin. Di serî da kêşeya ekonomîk, hemû kêşeyên berbehs dibin sebeb ku PCSyên ku xebatên Kurdî dikin, pêşiya xwe nebînin. Ev yek jî bi xwe ra endîşeya domdariyê û siberojê derdixe holê.

Kêşeya Ekonomîk û Xwegihandina Fonên Navneteweyî:

Kêşeya çavkaniyên ekonomîk, problemeke serekî ya PCSyên serbixwe ye. Di serî da kêşeya sazûmanbûnê, hemû pirsgrêkên ku PCS duçarî wan dibin, bi arîşeya aborî ra têkildar in. Di navbera arîşeya aborî û pirsgrêkên qada civaka sivîl da peywendiyek girîft heye. Ji xeynî yek du îstîsnayan, mirov nikare qala wê yekê bike ku ekonomiya saziyên sivîl têra wan dike. Piştewaniya ekonomîk a endam û dildaran ne bes e. Asta xwegihandina sponsor û bexşaran jî bisînor e. Her weha bidestxistina fonên li Tirkîyeyê ji bo PCSyên ku xebatê Kurdî dikin, hema bêje nemimkin e. Halê hazir, PCS bo xwegihandina derfetên ekonomîk zêdetir berê xwe didin saziyên navneteweyî yên ku çavkaniyên fonan bi rê va dibin.

Asta saziyên beşdar a xwegihandina fonên nawneteweyî (yek du îstîsna ne tê da) êpê bisînor e. Sedema sereke ya vê rewşê krîmînalîzekirina xebatên Kurdî ya bi destê dewletê ye. Ev yek tesîreke neyînî li pêvajoya qerardayîna biryardaran dike. Ji aliyê din va polîtîkayên dewletan û tîkiliyên navdewletî yên di warê xwegihanadina fonan da rêyê li ber qada xebatên Kurdî digirin. Li gel vê, hin nelirêtiyên ku di rêvabirina fonan da qewimîne, întibayeke xirab ava kiriye û bi vê întibaya negatîf pirî caran hemû PCS tîn tometbarkirin. Ev tometbarkirina neyînî xwegihandina fonan asteng dike. Ji bo guherandina vê întiba û îmajê negatîf, xebatên kolektîf ên li ser prensîba zelaliyê dê rêxweşker bin. Xebatên bi vê tevnê, dê xwegihandina bexşaran jî hêsantir bike. Di vê çarçoveyê da, xebatên PCSyan ên derbarê pirsgrêkên bingeîn ên civakê da û agahdarkirina raya giştî ya ji xebatan xwedî roleke krîtîk e. Divê PCSyên serbixwe bi fealiyetên xwe zêdetir bala raya giştî bikêşin û baweriyê bidin civakê. Civakîkirina armanc û vîzyona PCSyan dê asta darîçavbûna wan zêdetir bike û ev yek dê xwegihandina bexşaran hêsantir bike. Modeleke zelal a birêvabirinê piraliparêz, hevpar; û vîzyoneke fealiyetê ya li ser prensîbên gotî dikare çarçoveya "Polîtîkaya Bexşaran" jî diyar bike.

Ji aliyê din va PCSyên serbixwe bi avakirina mekanîzmayên berfireh û mişterek dikarin bi saziyên navneteweyî yên biryarder ra peywendiyên rasterast deyînin.



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

PCSyên ku xebatên Kurdî dikin, bi vê rêbazê dikarin encamên erênî yên demdirêj bi dest bixin. Bi projeyên kartêker û tekûz, ravekirina pirsgerêkên dirokî û civakî yên ku naveroka xebatên Kurdî diyar dikin, dikarin întiba û îmajê neyînî ya berbelav biguherînin û xwegihandina fonên navneteweyî hêsantir bikin.

Kolektîvîzekirina projeyên bi vî rengî dê merheleya wan a amadekirin û birêva-birinê bihêztir bike û bidestxistina çavkaniyên ekonomîk jî rehetir bike. Kêmbûna kesên di warê amadekirina projeyan da xwedî tecrûbe kêşeya hevpar a PCSyan e. Divê sazîyên navborî ji bo gihandina kesên pîşpor û şareza xwedî polîtîkayên taybet bin û bi vê armancê programên taybet bi pêş bixin. Her weha wek çareseriyêke kurtedemî, PCSyên serbixwe dikarin zanyarî û tecrûbeyên xwe yên derbarê amadekirin û birevebirina projeyan da bi hev re par va bikin.

Ji aliyê din va beşdarên komxebata navborî rîska modela sazîyên bi fonan va girêdayî tesbîtkirina û balê dîkêşin ser girîngiya lêgerîna rê û rêbazên alternatîf. Di şeweya civaka sîvîl a têkildarî fonan da armanc û amraz bi hêsanî dikarin cih biguherînin. Bo nimûne beşdarek diyar dike ku pîrî caran li gorî xebatan proje nayên peyda kirin lê xebat û proje li gorî fonan tên amadekirin. Ev yek dikare karaktera serbixwe û rexneker a civaka sîvîl têk bibe; mîhwer û îstîqameta hedefên esasî biguherîne. A soxîn, ji bo bihêzkirina kapasîteya sazûmabûnê û hevterîbî wê, ji bo mayîndekirina xebatên xweser, mizakerekirina derfetên “çavkaniyên ekonomîk yên xwemalî”, dikare rêyê li ber encamên stratejîk û demdirêj veke.

Pêşniyazên Komxebatê

Beşa dawî ya komxebatê ji bo pêşniyazan hat terxankirin. Beşdarên ku di rûniştinên dîtir da qada civaka sîvîl bi giştî tehlîl kirin, pirsgerêkên bingeîn tesbîtkirin û kêşeyên PCSyan mizakere kirin, di vê beşê da pêşniyazên xwe yên giştî û pratîkî berpêş kirin.

Pêşniyazên giştî

1. Ji bo armanca bipêşxistin û hîmdarkirina çand û zimanê Kurdî akademiyeke online dikare bê damezirandin.
2. Ji bo sazûmankirina xebatên parastina nîrxên çandî û xwezayî saziyeke hevpar/neteweyî dikare bê avakirin.
3. Ji bo armanca hêwirandina kes û komên ku duçarî qeyranên domdar an jî demkî yên wekî kerset, koçberîya cêbrî, krîzên



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

ekonomîk dibin, “Torên Piştewaniya Civakî”, dikarin bêne sazkin. Divê bi kesayet ê saziyên berbehs ra koordinasyonekê bê avakirin.

4. Pêkhatyên Civaka Sivîl dikarin bi saziyên li dîasporayên ra platformeke lobî û dîplomasiyê ava bikin. Platformeke weha dikare di warê zimên, statû, temsîliyet, mafparêzî û hwd. da xebatên navneteweyî bimeşîne. Platformeke bi vê tevne dê xwegihandina fonên navneteweyî jî hêsantir bike.

5. Divê bi saziyên ciwanan ra hevkarîyên stratejîk bêne avakirin. Nexasim, bi wam kom û dezgehên ciwan ra yên ku xebatên çandî û ramanî organîze dikin, divê peywendiyên taybet bêne danîn. Ev yek dê rêyê li ber beşdarbûna ciwanan a ji bo civaka sivîl veke.

6. Platformên online yên ji bo zarokan dikarin bêne avakirin. Ev platform dikarin li ser çand, huner û perwerdehiya zimanî bernameyan rabeî zarokan bikin.

Pêşniyazên pratîkî yên derbarê diyaloga Pêkhatyên Civaka Sivîl de

1. Bi armanca berdewamiya diyaloga PCSyan toreke/platformeke hevpar dikare bê avakirin. Mekanizmeyeke hevpar a ku nav, lixwegir û taybetmendiya wê dê paşê bê diyarkirin, ji bo mayîndekirina diyalog û hevkarîya civaka sivîl dê bikêrhatî be.

2. Bi armanca pêşandana xebat û projeyan malpereke hevpar dikare bê sazkin. Bi malpereke weha ra PCS dê ji xebatên hev haydar bin û ew dê ji hev sûdê wergirin. Ev malper dê di heman demê da bibe berhemeke “bîbliyografîk.”

3. Bi mebesta şênberkirina armanc û hedefên diyaloga PCSyan “Nexşeyeke Startejîk” dikare bê amadekirin. Belgeyê weha dikare armancên stratejîk ên diyaloga civaka sivîl ji bo raya giştî ya neteweyî û navneteweyî ragihîne. Ev Nexşe dê asta darîçavbûna PCSyan jî dê zêdetir bike.



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

4. Ji bo dorfirehkirina diyaloga civaka sivîl komxebatên hev-şêwe dikarin bêne organizekirin. Ev komxebat dikarin periyodîk bin û li ser mijarên spesîfiktir rawestin.

5. Divê naverok û çarçoveya komxebatan bêne berfirehtirkin. Civandina komxebateke bi beşdariya saziyên ji dîaspora û parçeyên din yên Kurdsitanê dibe ku gelek bibandor û sûdmend be.

6. Bi armanca bikaranîna kartêker a medyayê û ji bo ragihandina fealiyetan a bi awayekî birêkûpêk, dikare atolyeyên tematîk bêne çêkirin. Saziyên beşdar ên qada medyayê dikarin bi rola lidarxistina atolyeyan rabin.



RAPORA KOMXEBATA DIYALOGÊ YA DI NAVBERA SAZIYÊN SIVÎL Û AKTORAN DA

BAN • DÎTAM • DÎSA • BOTAN INTERNATIONAL • KURDISH STUDIES CENTER • WEQFA MEZOPOTAMYAYÊ
WEQFA TAHÎR ELÇÎ • WEŞANXANEYÊ VATEYÎ • DKVD • KÛRT-KAV • BARAN TURSUN VAKFI • LÊKOLÎNÊN KURDÎ
CHALAK EVENTS WAN • DÎWAN INTERNATIONAL THEATRE ACADEMY - ŞERMOLA PERFORMANS
XÎRET FOUNDATION • KOMELEYA ÇAND Û ZIMANÊ KURDÎ • BATMAN YENÎ SAHNE
DEMOS ARAŞTIRMA DERNEĞİ • ENSTÎTUYA KURDÎ YA PARÎSÊ